

JOSEPHO DAL POZOLO

SEMINARII VICETINI RECTORE

ECCLESIAM SUAM ARCHIPRESBYTERALEM MONTURSI

NUNC PRIMUM ADEUNTE

CARMEN

Ioannis Facci



VICETIAE MDCCCXXXVII.

TYPIS PICUTTI EDIT.

1871

1872

1873

1874

1875

OPTIME ARCHIPRESBYTER

Profciscenti Tibi ex hoc Seminario, cui singulari vigilantia, studio, pietate praeſuiſti plurimos annos, et Eccleſiam Monturſii, cui Paſtor datus es, magno cum populi gaudio hodie ingreſſi, ut gratulemur aliquo modo, hoc qualecumque carmen exhibemus. Accipe pignus obſervantiae et laetitiae tuorum, qui Tibi fauſta omnia et felicia ominantur.

Die XII. Kal. Jun.

Seminarii Vicetini Praeceptores.

Gloriamur in spe gloriæ
filiorum Dei . *Ad Rom.* 5, 2.

CARMEN

Surge, anima, ex imis jam tandem expergita terris:

Major agit spes et majora ad munera ducit,
 Spes fidei soror et coeli omnipotentis alumna,
 Quæ demum everso venit succurrere mundo,
 Humanosque adiit coetus. Tum lilia passim
 Arridens, roseosque dedit natura colores,
 Et valles plausere cavae, campique, lacusque
 Quocumque illa pedem movit. Proh gaudia seclis
 Quanta tulit! Quantis avertit pectora curis!
 Sic hominum moestum blande solata timorem:
 Mortales, quicumque fidem numenque secuti,

En ego spes animae et requies paxque unica vestrae :
 Per me sidereas dabitur quoque scandere sedes.
 Multa tamen subeunda prius. Bella impia terris ,
 Tartareasque acies late discurrere cerno .
 Ne trepidate minis. Vobis ego Numen Olympi
 Concilio, et vasto descendens gratia fonte
 Defensosque dabit, victoresque inferet astris.
 An non pro vobis orantem in funere Iesum
 Cernitis, atque pio monstrantem vulnera Patri?
 Tantus amor Superis humanam attollere stirpem.
 Dixit, et aetherea succendit pectora flamma
 Alta petens, hominesque supra mortalia tollit.
 Illi oculos extemplo ad coelum et tendere palmas,
 Spemque colunt avidi, atque ardenti corde sequuntur.
 Quis mihi delicias hominum, quis gaudia recti
 Incorrupta animi, pacemque in mente latentem
 Explicet, unde etiam laetum jubar emicat ore?
 Jamque illis meliora polo sol lumina spargit,
 Atque fluunt sine nube dies. Non mille labores,
 Non curae, turpisque animos contristat egestas:
 Quin et opes alii, fulgentisque omnia tecti
 Gaudia subjiciunt pedibus. Jam pandite, montes,

Thebaidum montes, secretos pandite saltus.
 Quam juvat in latebris sylvisque silentibus aevum
 Ducere, proque polo terrae bona cuncta pacisci!
 Quid mala commemorem tenebris accita profundis,
 Bellumque, horrificamque famem, turbamque nefandam
 Morborum vultus toties stupuisse serenos
 Christiadum? Immani fervent a caede tyranni
 Immeritam aggressi nequicquam excindere gentem.
 At supero erecti regno vel morte sub ipsa
 Heroes gaudent laceri crudeliter artus;
 Tendentesque polo flammantia lumina matres
 Hortantur caros infanda ad funera natos.
 At spes ex alto pulcros mirata triumphos
 Exultat, comitesque suos ad proemia ducit.
 Quo feror? Unde mihi ante oculos tam clara repente
 Lux oritur? Laeto resonant quid sidera cantu?
 Cerno animas, lectamque manum super aethera tolli.
 Ipsa triumphantes optata in regna catervas
 Spes ducit, reseratque domum radiantis Olympi.
 Quo mens imprudens tendis? Jam comprime cursum:
 Non tibi res miras, immensaque munera coeli
 Pandere fas mundo, vulgataque ferre per ora.



